

**VENDIM**  
**Nr.122, datë 17.2.2010**

**PËR DISA NDRYSHIME NË VENDIMIN NR. 377, DATË 31.5.2001 TË KËSHILLIT TË**  
**MINISTRAVE “PËR SIGURIMIN E INFORMACIONIT TË KLASIFIKUAR “SEKRET**  
**SHTETËROR” NË MARRËDHËNIET NDËRKOMBËTARE”, TË NDRYSHUAR**

Në mbështetje të nenit 100 të Kushtetutës dhe të neneve 25 e 31 të ligjit nr.8457, datë 11.2.1999 “Për informacionin e klasifikuar “Sekret shtetëror”, të ndryshuar, me propozimin e Kryeministrit, Këshilli i Ministrave

**VENDOSI:**

Në vendimin nr.377, datë 31.5.2001 të Këshillit të Ministrave, të ndryshuar, të bëhen këto ndryshime:

1. Shkronja “b” e pikës 3, shfuqizohet.
2. Pika 4 shfuqizohet.
3. Në pikën 5, fjalët “...një person apo organizëm...” shfuqizohen.
4. Pika 6 shfuqizohet.
5. Pika 8 ndryshohet, si më poshtë vijon:

“8. DSIK-ja autorizon, me shkrim, hapjen, në ministri dhe në institucione shtetërore, të zyrave të nënregjistrimit të informacionit të klasifikuar të NATO-s, mbikëqyr veprimtarinë e tyre dhe vendos mbylljen e tyre, kur nuk respektohen standardet ligjore për sigurimin e informacionit dhe, kur e gjykon të panevojshme, mbajtjen hapur të tyre.

Shkëmbimi i informacionit të klasifikuar me NATO-n kryhet në mënyrë të drejtpërdrejtë nga zyrat e nënregjistrimit të informacionit të klasifikuar të NATO-s, të ngritura pranë ministrave dhe institucioneve shtetërore.”.

6. Pika 9 ndryshohet, si më poshtë vijon:

“9. Transmetimi, transportimi dhe transferimi i informacioneve e i materialeve të klasifikuara të NATO-s shteteve dhe organizatave të tjera ndërkombëtare të kryhen vetëm përmes personave, rrugëve e mjeteve të përcaktuara dhe të certifikuara përshtatshmërisht.”.

Ky vendim hyj në fuqi pas botimit në Fletoren Zyrtare.

**KRYEMINISTRI**  
**Sali Berisha**

**VENDIM**  
**Nr.443, datë 16.6.2010**

**PËR PËRZGJEDHJEN E INSTITUCIONEVE FINANCIARE PËR KRYERJEN E**  
**SHËRBIMIT TË MBAJTJES SË LLOGARIVE DHE TRANSFERIMIT TË**  
**PAGESAVE TË INSTITUTIT TË SIGURIMEVE SHOQËRORE, TË INSTITUTIT TË**  
**SIGURIMIT TË KUJDESIT SHËNDETËSOR, SI DHE TË NDËRMARRJEVE E TË**  
**SHOQËRIVE TREGTARE SHTETËRORE**

Në mbështetje të nenit 100 të Kushtetutës dhe të shkronjës “dh” të nenit 5/1 të ligjit nr.8487, datë 13.5.1999 “Për kompetencat për caktimin e pagave të punës”, të ndryshuar, me propozimin e Ministrit të Financave, Këshilli i Ministrave

**VENDOSI:**

1. Miratimin e rregullave për përzgjedhjen e bankës apo të institucionit financiar jobankar të autorizuar nga Banka e Shqipërisë, që më poshtë do të quhen institucione financiare, për kryerjen e shërbimit të mbajtjes së llogarive të Institutit të Sigurimeve Shoqërore, të Institutit të Sigurimit të Kujdesit Shëndetësor, si dhe të ndërmarrjeve e të shoqërive tregtare shtetërore, që më poshtë do të quhen institucione.

2. Miratimi i këtij vendimi ka për qëllim mirëpërdorimin e fondeve publike, sigurimin e integritetit e të transparencës në procedurat e përzgjedhjes, për çeljen e llogarive të institucioneve të sipërpërmendura, si dhe uljen e kostos së shërbimeve të lidhura me këto llogari.

3. Përzgjedhja e institucionit financiar, të parashikuar në pikën 1 të këtij vendimi, për shërbimin e mbajtjes së llogarive realizohet nga institucioni, me konkurrim, në përputhje me këto parime të përgjithshme:

a) Mosdiskriminimin dhe trajtimin e barabartë të institucioneve financiare ofertuese;

b) Transparencë në procedurën e përzgjedhjes;

c) Nxitjen e pjesëmarrjes dhe të konkurrencës në procedurën e përzgjedhjes.

4. Për përzgjedhjen e institucionit financiar, që do të kryejë shërbimin e mbajtjes së llogarive, titullari i institucionit krijon një komision, i cili në përbërje të ketë një jurist prokurimesh dhe, të paktën, katër punonjës të tjerë, që nuk janë në përbërje të strukturës së shërbimeve mbështetëse të institucionit.

5. Komisioni i ngritur për këtë qëllim, për procedurat e përzgjedhjes, sipas parimeve të përcaktuara në pikën 2 të këtij vendimi, zbaton parimet dhe procedurat e parashikuara në dispozitat e krerëve III, V e VI të ligjit nr.9874, datë 14.2.2008 “Për ankandin publik”.

6. Për kualifikimin e institucionit financiar mbahen parasysh kriteret e mëposhtme:

a) Komision minimal deri në vlerën 0, për transaksionin e transferimit të pagesave të pagave të individëve, si dhe të pagesave të tjera të lidhura me punën, në bankat e kërkuara nga vetë ata;

b) Komision minimal deri në vlerën 0, për mirëmbajtje llogarie të pagave e të pagesave të tjera, të lidhura me punën për individët që i kanë llogaritë e pagave në të njëjtin institucion financiar me atë në të cilin mbahen llogaritë e vetë institucionit;

c) Kosto minimale për transaksion;

ç) Interes maksimal për llogari depozite pa afat;

d) Shpejtësi në kryerjen e depozitimit të të ardhurave të lidhura me punën, të përmendura në shkronjat “a” dhe “b” të kësaj pike;

dh) Shpejtësi dhe cilësi në kryerjen e transaksioneve nga llogaritë e punonjësve publikë;

e) Komision minimal për blerje të titujve shtetërorë;

ë) Cilësi shërbimi për sa i përket transparencës me subjektet, të cilat përdorin sportelet e institucionit financiar;

f) Shpejtësi në dhënien e informacionit për mbajtësin e llogarisë, sa herë që kjo të kërkohej nga ky i fundit;

g) Të tjera që mund të shtohen nga institucioni.

7. Marrëveshjet e lidhura me institucionin financiar të përzgjedhur sipas kriterëve të mësipërme të jenë vjetore dhe me të drejtë përsëritjeje, në rastin e respektimit të kriterëve, të cilat kanë shërbyer për përzgjedhjen. Në marrëveshje parashikohen të drejtat dhe detyrimet e palëve, procesi i monitorimit gjatë zbatimit të marrëveshjes, si dhe e drejta e zgjidhjes së marrëveshjes në mënyrë të njëanshme për rastet e mosplotësimit të detyrimeve.

8. Transfertat për pagesa nga skema e sigurimeve shoqërore dhe shëndetësore mund të bëhet, në institucionin financiar të përzgjedhur nga organet vendimmarrëse përkatëse apo në institucionin financiar të kërkuar nga përfituesi, pas plotësimit, rast pas rasti, të formularit të miratuar për këtë qëllim.

9. Ngarkohen organet vendimmarrëse të Institutit të Sigurimeve Shoqërore, të Institutit të Sigurimeve të Kujdesit Shëndetësor, si dhe të ndërmarrjeve e të shoqërive tregtare shtetërore për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI  
**Sali Berisha**